

 Udruženje
Pokret "Majke enklave Srebrenica i Žepa"

71000 Sarajevo, Nedima Filipovića 17, tel/fax: ++387 (0) 33-214-749, tel.: 522-266
e-mail: srebrenica.zepa@bih.net.ba

Broj: 143/14
Sarajevo: 08.08.2014. godina

BOSNA I HERCEGOVINA
FEDERACIJA BOSNE I HERCEGOVINE
VLADA
PREMIJER
n/r gospodina Nermina Nikšića

Poštovani premijeru Nikšić,

Obraćam Vam se ispred Udruženja „Majke enklava Srebrenica i Žepa“ i kao jedna od mnogobrojnih majki koje su u proteklom ratu u Bosni i Hercegovini, na najsvirepiji način, izgubili svoje najmilije, obraćam Vam se i kao predsjednica Udruženja koje egzistira u bh. društvu iz potrebe da svi nestali tokom agresije na Bosnu i Hercegovinu, skriveni u masovnim grobnicama, budu pronađeni, da njihove kosti povrate ime i prezime koje su ponosno nosili prije nego ih je napala zločinačka ruka agresora i da konačno pronađu smiraj na jednom od mnogobrojnih mezarja koji nastase na bosanskoj zemlji kao posljedica genocidnih radnji nad nama Bošnjacima-muslimanima, nad našom djecom, našim sinovima, našom braćom, našim muževima, našim komšijama.

Poštovani premijeru Nikšić,

Godinama unazad naše udruženje ostvaruje blisku saradnju sa JKP „Gradska groblja“ d.o.o. u Visokom, kao i sa JKP „Komemorativnim centrom“ d.o.o. u Tuzli, preduzećima koji svojim ozbiljnim i savjesnim radom obavljaju ekshumacije, identifikacije i smještaju posmrtno ostatke naših najmilijih i na tako olakšavaju našu višegodišnju agoniju u iščekivanju da naše najmilije pronađemo, identificiramo i ukopamo na dostojanstven način.

Mi članice Udruženja „Majke enklava Srebrenica i Žepa“ i sve druge majke koje žive dane u iščekivanju da pronađu svoje najmilije u masovnim grobnicama, koje zločinci godinama skrivaše od očiju javnosti, ne možemo od sebe sakriti istinu da se poslovi na identificiranju posmrtnih ostataka koji su smješteni u JKP „Gradska groblja“ d.o.o. u Visokom i JKP „Komemorativnom centru“ d.o.o. u Tuzli odvijaju veoma sporo i da nedostaje finansijska podrška Vlade Federacije BiH. Vrijeme nagriza naše nade da će kosti naših najmilijih biti pronađene i kompletirane i da se kolektivne dženaze neće klanjati samo dijelu posmrtnih ostataka naših sinova, braće i muževa čije se kosti i danas na devetnaestu godišnjicu genocida u Srebrenici pronalaze u nekoliko različitih masovnih grobnica.

Pojedine majke enklava Srebrenica i Žepa osjete tešku radost, ali ipak radost što mogu otići svojim najmilijim na mezar, što znaju gdje se nalaze. Ali, isto tako pojedine majke enklava Srebrenica i Žepa još uvijek čekaju i nadaju se da će biti pronađene kosti njihovih najmilijih. Sramota je da te majke čekaju devetnaest godina i više, čekaju jer nažalost mnoge stvari nedostaju u koordinaciji zvaničnih organa vlasti da istraju u nastojanjima da što više ubijenih ljudi, ubijenih samo zato što su za zločince nosili pogrešno ime, što su bili Bošnjaci-muslimani, budu pronađeni, identificirani i ukopani. Čini nam se da je naše političare vrijeme odvelo u neke druge borbe, borbe za političke fotelje.

Poštovani premijeru Nikšić,

pokažite nam da nije tako, podržite JKP „Gradska groblja“d.o.o. da povrati snagu i da snažnije radi na zajedničkom cilju, na identificiranju naših najmilijih i na organiziranju kolektivnih dženaza.

Poštovani premijeru Nikšić,

moram pisati redove ovog pisma u nadi da će te na trenutak staviti po strani svoje svakodnevne političke aktivnosti i da će te osjetiti razloge što nam je zaista stalo da poduprete, u svakom obliku, rad JKP „Gradska groblja“d.o.o. u Visokom i JKP „Komemorativnog centra“d.o.o. u Tuzli. Udruženje „Majke enklava Srebrenica i Žepa“ kao i ostala slična udruženja neće posustati u nastojanjima da kosti naše djece ne leže u vrećama u hladnjačama, nego da pomognemo i ubrzamo rad ljudi koji godinama

bezrezervno obavljaju poslove identificiranja i ukopa ubijenih-naše djece, naših muževa, naše braće, naših očeva, naših komšija.

Želim da, makar na trenutak, osjetite nemoć naših majki u borbi sa institucijama koje su se, stavljajući po strani ove probleme, otuđile od nas i od onih koji svojim radom pomažu da ukopamo naše najmilije. Mi majke stalno posjećujemo i JKP „Gradska groblja“d.o.o. u Visokom i JKP „Komemorativni centar“d.o.o. u Tuzli i borimo se da istina ne bude skrivena, da pravda dočeka ljude koji zauvijek ugasiše radost u našim očima. Nama su suze i tuga postali najiskreniji prijatelji, nama su ljudi i preduzeća koji rade na pronalasku kostiju naše djece postala nezaobilazna mjesta naših putovanja.

Premijeru Nikšić,

mi ne možemo ostati imune na vijesti u koliko se teškoj finansijskoj situaciji nalazi JKP „Gradska groblja“d.o.o. i JKP Komemorativno centar d.o.o. Tuzla . Iako smo svjesne da nedostaje finansijskih sredstava u svih segmentima našeg društva, isto tako želimo da se ne zaboravljaju naša djeca i da se ne zaboravlja istina o stradanju, da se ne zaboravlja važnost poslova na otkrivanju, identificiranju i ukopu žrtava.

Svima nama u Bosni i Hercegovini je potrebno da se okrenemo budućnosti, ali mi to ne možemo uraditi dok ne učinimo sve što je moguće da pronađemo kosti ubijenih, da ih ukopamo i smirimo njihove napaćene duše. Sve dok se ne pobrinemo za stradale, ne možemo očekivati hair u budućnosti, kako za porodice stradalih, tako ni za sve iskrene patriote naše domovine Bosne i Hercegovine.

Poštovani premijeru Nikšić,

iznađite mogućnosti i podržite JKP „Gradska groblja“d.o.o. jer na taj način podržavate nas majke u nastojanjima da neizvjesnost u iščekivanju nestane, podržavate da se naša ispucala srca ispune mirom kada znamo gdje su kosti, gdje su mezarja naše djece, naše braće, naših očeva

S poštovanjem

Udruženje Pokret
Majke enklave Srebrenice i Žepe